

永春县志

永春县地方志编纂办公室 整理

厦门大学出版社

永 春 州 志

(清乾隆二十二年版)

永春县地方志编纂办公室 整理

厦门大学出版社

1994 年·厦门

[闽]新登字 09 号

永春州志

(清乾隆二十二年版)

永春县地方志编纂办公室 整理

厦门大学出版社出版发行

福建省新华书店经销

永春县印刷厂印刷

开本 850×1168 1/32 14.375 印张 361 千字

1994 年 12 月 第 1 版 1994 年 12 月 第 1 次印刷

• 印数:1—2000 册

ISBN 7-5615-1006-3/K·182

定价:30.00 元

整理重印《永春州志》序

旧志历来珍收秘藏于少数书馆和士仕之家，一般邑民出于乡土之心，欲探史窥志而不可得，每引为憾。而今欣逢盛世，新编了《永春县志》，广为传播。但由于篇幅所限，新志只能遵循详今略古的编纂原则，记载重点在于近现代，且基于当代，古代部分笔墨不多。为使读者了解更多的永春历史，并方便查阅旧志，县方志办决定整理重印《永春州志》（杜昌丁督修版）。

永春历史上曾有由场而县而州的建置沿革。清雍正十二年升为直隶州，辖德化、大田两县，州治达180年之久。此间，州牧亲自主持编修的志乘有两部，一部系乾隆二十二年知州杜昌丁聘永福人黄任编修，另一部系乾隆五十二年知州郑一崧聘邑人颜珩重修。

以现存两部州志与另两部旧县志比较，杜昌丁督修、黄任主编的《永春州志》的体例比较完整、内容比较丰富、文字也比较简练。这与杜昌

丁、黄任的文史功底分不开。黄任，字莘田，福建省永福县（今永泰县）人。康熙年间举人，曾知广东省四会县。他属文工诗，著有《秋江香草斋》集。同时，他又是修志专家，记述颇重史实，很有研究价值。县方志办选择这部州志作为点校蓝本，是选准了的。

整理出版旧志，钩沉辑遗，徵文考献，以古鉴今，资治兴邦，昭往彰来，得益当代，泽惠后世，意义重大。值此州志付梓之际，爰书数语，叙其缘起，是为序。

中共永春县委书记 洪辉煌

一九九四年七月一日

序

唐李吉甫作《元和郡国志》，谓执此可以善治。夫志，不过寰宇山川，则壤赋役，风俗淳漓，人物臧否数者，非真能如《春秋》之书，为圣人极致，治世要务，如何休^①之所云。而遂以为其通于治，非以其彰往察来，观民化俗，莅军行政之胥于是；在于以昭法戒，定取舍，而端治源也耶？若徒斤斤于簿书钱谷，过之不暇，则志亦具焉已耳。

永春在昔为县，与德、大比邻，复岭重冈，深林密菁，易为蜚尾殳牙之窟。我朝雍正十二年，升县为州，割泉、剑之二邑来属。其山水之蜿蜒，道里之错伏，习俗之符契，若一人之身，筋联骨属，脉贯血输，诚有辅车唇齿之势。而各邑旧有专志，不相连属，此州志之不可以已也。

顾设州以来，不佞首承乏。今且二十余年矣。中以养去者一，以奉使去者一，以署篆去者三，有志斯役，率逡巡未果。每公余，进州之大夫、士，告以纂修之举，莫不踊跃欣佐，捐辍以襄盛事。丙子夏，敦聘余友永福黄十砚^②偕其小阮成迪，同属笔焉。适不佞复视泉篆，弗即开局。十砚家富藏书，又勤于采辑，心手勾稽，搜残缺于蟬丝蠹屑中，视旧志增十之五六。是年冬，不佞归永，请卒業。遂相与商榷考订，为类二十有四，为卷三十有五。其宦迹乡懿之弃取，则不佞专司之。

凡十阅月而书成，复进州大夫、士，而谓之曰：“不佞之所以告无罪于是邦者，岂惟是稽图数典，俾文献无阙遗？亦城隍戎马之牧宁，版籍户口之拊卹，民风士习之率作整齐。坐公署则思承流，溯名宦则思景附。尔都人士，于前辈名卿硕彦，流风余韵，亦必读是志而喟然兴，以似以续，为魁垒，为俊乂，绳绳延延于先正之典型，而使之勿坠。于以上承圣天子一道同风、人文化成之盛，是则不佞以志为治之意也。”是为序。

大清乾隆二十有二年，岁次丁丑，仲夏之吉。诰授奉直大夫、永春直隶州知州青浦杜昌丁撰。

[校 注]

①何休 东汉经学家，主要著作有《春秋公羊解诂》，为今文经学家议政的主要依据。

②黄十砚 即主编黄任。

序

北齐秘史，千古唾之。而唐宋名士，为人作传志、碑文，亦间有装饰过当者。夫家乘邑乘，各自为书，他时听上采择，汇成大编，其诸信今传后，不可以不慎也。

永春旧隶于泉，雍正十二年，始改建直隶州，以德化、大田割属附庸，为枢纽中一大纲领。矧此两纪以来，川原田赋，官室寺观，人物风尚，增损不齐，异同错见，若任其散轶不收，司牧者其谓之何？

杜君文学朴忠，余所默契。其来吏此州也，垂二十余年。领袖群英，旁搜博览，补亡求遗，铸一都会。兹州志告竣，乞序于余。检阅之下，条理井然，体制合度，而不事妆饰，尤足以丑夫浅陋多文者。余故嘉其大概，欣然搦管，遂忘此事之拙，并藉以为寿云尔。是为序。

时乾隆二十有二年，岁次丁丑，小春穀旦。抚闽使者长白钟音撰。

嘉靖丙戌旧志叙

· 閩平崖林钱撰 ·

永春山邑无邑乘。柴子曰：“邑无志，宰弗职也，成周法制，具于《周礼》，志奚可缺蔑耶？”乃走聘次崖林子纂成之。

夫志，政之具也，修志所以立政。余读其志，亦详哉其言之也。夫舆地，邑之纲纪于山川也；志登規制、版籍、官守、人物，所以扬榷古今，监世盈虚，董劝昭垂，为后之施治也。古人见其著书，欲观其行事。斯志也，林子学足资世，昭矣。

传曰：“儒者通于世务。”曰：“言道德者，多溺其职。要之，可论亦不可论也。”余观柴子守閩，破觚斫雕，政若闷闷，惠究下而名，顾不上剖暴，乃改永春邑宰。永春疆险，于万山之隘，多寇贼。虽或非其产，险，故盗贼所凭阻其疆也。柴子至，逾月，贼至，柴子竦戎，贼去。越岁再至。再岁三至。柴子曰：“文武不修，良民惧，乃形格势禁。”身与戍伍均粮，苦追击赴战，剿薶于小尤中、碧溪、鸡母岫等寨。柴子可谓武矣！顾政何若闷闷？非曰道德云耶？永春多山谷，其土刚，民犯禁者滋。柴子思省吏职，求威德之。三载，民黜暴入顺。士多资富箴教，柴子兴其学，遑遑于庠塾之事，崇化厉贤，士始叠叠好文学。柴子可谓儒者。蒸蒸吏治，不可谓不通世务也。柴子尚贤，立政如是，是之谓知务。余故备宰之贤，撰志序。

旧志后序

• 林希元 •

昔者禹既抑洪水，乃分九州，定山川，别疆圻，条物产，辨贡赋，地理之书，于是昉矣。周有外史，掌四方之志，志之名始见。嗣后，国史地志，转相祖述而已。史志、地理、郡国志，有畿服、舆地、区宇，各自名家、滥觞百代。

夫志，邑之史也，备一邑之事者也。地理云乎哉？山川、风物存乎舆地，建置存乎規制，国计存乎版籍，吏治存乎官守、人物；词翰，文献之征也；杂志，众流之府也，罔弗备矣。故志有道焉：规度欲正，正以立体；该载欲尽，尽以周物；考核欲精，精以审是；品量欲公，公以永鉴。四者具，斯良志矣。《书》、《礼》、《春秋》，始亦志也，犹之摺、邱、乘、机也。删定于孔氏，遂列之经，万世宝焉。非夫尽性经政，其言足以法与？六经远矣，《史记》一书，杰作也，入出抵牾，间或莫掩，至独出机轴，首变古法为今制，有百代不能易者，舍短用长可也。

今郡国咸有志，类失步邯郸，谁登古雅。永春志阙久，尹天台柴仲和氏病焉。既之，宪长昆山周公以斯督郡县，仲和欣然承之，辄弗予揆，以其事属予。既爰事，取旧志读之，皆荒诞猥俚，弗可藉手。加之文献残落，昔贤遗事，漫无所于考，乃与仲和悉力搜研，稽政于官、问俗于野，访遗于荒山古庙，补其脱略，续其新，黜其不丁载者。暑寒交，始克就事。例以义起，事从其类，凡七志，分九卷。夫事不师，匪克有闻。元也志长力短，博观百氏，庸酌厥衷，鼠抵牛场。容知免夫。

嘉靖丙戌旧志序

· 仁和邵锐撰 ·

宪使周充之甫，莅任伊始，即令有司各以志上。以度地势，以咨民风，以核吏治，互稽参验，审厥攸宜，会诸一心，俾助理。于是，永春柴尹鑑，始作邑志，用塞嘉命。廷评林懋贞甫，实总厥事，底于有成。

惟永春阻山以治，实号荒远，稽古礼文之事，类就缺略。惟是风气庞厚，笃生善良。有义门陈氏者，爰自南宋入我明，合族以居，历世十二，内外雍肃，人罔间言。揆厥所由，类尚淳质，三代典型，于是乎在。今志特书，庸阐厥美。呜呼，兹固兹①邑所以重者乎！不惟其势惟其人，不惟其华惟其实，兹固所以重兹②邑者乎！予故表而出之，俾天下后世。被兹休风，咸用兴起，有耻有劝，用赞治于无穷，则兹邑亦与有望也已。若诸志云云，雅有史法，非苟作者，观者宜善求之。

〔校 注〕

①、②兹 应按清乾隆五十二年颜本《永春州志》（以下简称颜本）作“斯”。

万历丙子旧志序

· 晋江朱安期书 ·

邑得有志乎？邑从郡而为之志者也。古者王朝、列国之史，皆谓之志。《周官》小史、外史，掌邦国四方之志是也。故郡史从古而名志，邑无史而不得名志。吾故曰：“从郡而为之志者也。”

永春，泉支邑，介在岩险郁岨之中，离郡百二十里余，减丞、簿，仅设尉。顾山川、贡赋、仪文、器度、官职、人物，咸与上邑等埒，非独异也。惟是界漳平、清溪^①、德化诸邑，林菁绵密，颇有窥攘。近年岛夷弗靖，奸寇乘间猖獗，民遭荼惨，赖谟谋威略歼平之。兹疮痍瘳，士民渐知所息踵，中间数年耳。事变兴革，文献嗣张，奚啻更仆；终述往事，诏来者，何稽？惟稽诸志。

旧志修自嘉靖初，为林次崖氏希元、柴侯鑑，实始缀焉。乃今许侯兼善，当甫戡之后，思与民休息，方将均粮平赋，蠲其浮赋，军民咸输情谐洽。问所疾苦，求诸往牒，志版图籍已焚毁，矧曰简脱放佚之云乎！虽欲不修，明不可其已矣。于时郡守厚山邱公，锐意邑属之治，亦谓前事不忘，后事之资，是宜亟图。乃属安期使从事。余惟邑志从郡，曩尝预纂修郡志，叨随执役于今司寇黄葵峰先生，而窃取其义已备矣。顾今惟一邑之事，鉅细毕陈，补缺划陋，可以为后人章程，是无忝已，又非有笔削予夺事也。即有笔削予夺，亦稽诸有众，遍访贤士、大夫、山氓、故老而为之。余安敢于其间哉？又况分校蒐阅，勿至异同，则有乡文学蔡君钟、刘君龙；而率弟子员方平、刘大义以考异析疑，辨误正讹，则司训君^②相与赞协之。余不佞实总其成。是故事必核，词必正，类例必审，弗泥前闻，强略时事，浮议罔牵，囿罔比焉。计三阅月，为

卷十有二。不敢曰作某志，仅以其目名卷者，惧有僭也。缮写已竣，侯取而读之，沾沾喜曰：“是可以观，可以劝，可以惩矣。兹以式于永，大且不朽，请序而饒之。”余惭志之不释，又何序？毋亦曰，其勿托诸空言也已，俾后之读是编者，咸绎其初指，曰：“某修之，其明而行之。”则斯志也，咸凿凿乎言之有据，其不为徒托诸空言也，是可以释余之惭也夫。

刻就，而郡推华平支公以视事至，整肃治纲，乐观厥成云。是举也，乡大夫宝庆通守郑君嘉猷始谋襄赞；春元王君天策、李君开芳咸有讨论；尉侯君三省，阅工督视、亦与有劳焉。法得备书。

[校 注]

①清溪 应按颜本作“安溪”。

②司训君 颜本作“司训某公”。

万历丙子旧志后序

志，史之流也。用以纪实昭邈，鉴往风来，一或不备，时久言湮，事将焉考？是故杞、宋无征，夫子惜之；诸侯去籍，孟轲氏不得其详。甚矣，志之不可以已也。

吾永春韦斋许侯之治邑也，政先体要，以邑志实吏治所出，民风所关，殚于政理，大而且急焉者。慨旧志遭寇毁，变故且繁，嗣事莫登，即议修辑之。因以状闻，遂得请于当道诸公，礼延晋江朱肖简先生，俾属笔焉。先生，乡之长者，有良史才。于是，以嘉靖丙戌同安林次崖先生所修志为经，以甲寅莆东荆游君续志为纬，参互考订，摘旧检新，阐幽征显，述其所宜书，益其所可来^①，如农政以重稼穡，秩祀以仁鬼神，防围以别武烈。至夫类例之审，不拘于前闻，而著其所未发，仍于各目之下，复为少论列。尤根极理要，参酌时宜，可以证今传后，谓非一邑之信史，百世之典型也哉。

志成，总若干卷，先生序其意于前矣。猥以不佞，滥叨分阅，命叙诸末简。窃谓斯志之成，许侯藉之以立功焉；先生垂之以立言焉；邑之人士得是而读之，景行前修，贞志飭躬，将期之以立德焉。异日者，人物踵美于有宋，风俗益淳于方来。即山川为之改观，疆域为之增重，斯志与地重殆将同流不朽，庶不负今日修明之意。先生恢阔统^②辨之才，绝类离伦之识，具见于笔削予夺中。古人所谓征文献^③而其详可得闻者，咸于兹焉在矣。尤讲于古人之学，其好恶端，其去取严，龙固可以无劳而蒙成。昔昌黎韩子之记滕王阁也，谓词列三王^④之次，有荣耀焉。余之记斯志也，不亦有余光乎哉！故不揆而为之序。

[校 注]

①来 颜本作“采”。

②统 应按颜本作“博”。

③三王 韩愈《新修滕王阁记》：“窃喜载名其上，词列三王之次。”三王，指作序的王勃，作赋的王绪，修《修阁记》的王仲舒。

修志凡例

——县有专志，州有统志。永春自国朝雍正十二年升县为州，以德化、大田来属，体相主辅，势若臂指，不可无志以统括之，与昔之专记一邑者异矣。

——县志宜详，州志宜略。但本州无附郭县，一切记载，不得概从简要。德、大两邑，各有专乘，去琐涤繁，亦期载而有体。

——旧志元以前无考。一修于明嘉靖丙戌，再修于万历丙子，三修于国朝康熙甲子，续修于雍正庚戌。今嘉靖志已佚不存。兹徧以万历邑志，德、大两邑志为本，参以《闽书》、《通志》，及群籍之散见者，搜讨采辑，颇为该备。

——自来志乘多分纲目，但为目既多，纲难统括。兹依《福建通志》、《福州府志》体例，立二十四门，去其荒俚而补其罅漏，匪云立异，究亦何必尽同。

——旧志不列星野，揆之体制，未免疏略。兹为编辑，以冠诸类之首。

——建置沿革，历代不同。我朝升县为州，规制为大备。兹详其故于前，而以表附之，使繙阅者如睹指纹。

——旧志不列《形势》，兹为补入，附载疆域之后。

——旧志于山分主从，不徒涉形家言，而前后左右亦不相联络。兹依《闽书》准，都分编列。至若八景、十景之说，尤属后人妆点，非山川本色，不敢滥载。

——田赋额数则例，首列国朝定制，而宋、元、明编次于后。具源委，备稽考，亦以见国家之薄赋轻徭，远非前代所及。

——州志职官，宜从州始，统所尊也。兹首列升州以后诸具官，而历代取官仍以次编列焉。

——选举自唐、宋以来，科目繁多。兹采辑各史，详其制度，

以冠于编。至于赏算入官，汉代已然，兹载其已登仕版者，而需次在官考职，未受地，不与焉。至例贡、例监，人数繁多，不胜纪载，惟由诸生援例者附之。

——人物依史例，首列传，次忠义、孝义、儒林、文苑、隐逸、艺术。至各史有道学，永属无其人，则阙之，不敢滥也。各传所载，必人与事称，故于旧志不能无增削，非敢以意为爱憎，亦期传信而已。至其人现存者，不立传，史例也。

——烈女分节孝、贞烈、名媛三类，其贞节有未题旌者亦附焉。

——旧志不列艺文，遂使前人著作湮没无闻。兹为详其书目，另为一编。其诗文有关典要者，分注于各类之下，以便参阅。

——志中援引群籍，俱记明书目，或标列于前，或侧注于下，不忘所自，且以征信也。间附按语，以辨疑，以正讹，非于旧志故为抵牾。